



Purs e puras ed ospitants cun la cussegliera federala. (da san.) Tarcisio e Maria José Pedroni, Eveline Widmer-Schlumpf e Marialina e Luigi Pedroni.

FOTOS G. N. STGIER

«Bains purils mantegnan la structura dal lieu»

Vicosoprano: brunch puril cun giasts prominents

DA GION NUTEGN STGIER / ANR

■ **Blera simpatia per cussegliera federala Eveline Widmer-Schlumpf, il di da la festa nazionala en Bregaglia. Vegl e giuven è vegni en rotscha per passentar intginas uras cun il giast da Berna. Tema central en ses pled per ils 1. d'avust èn stads ils manaschis purils.**

Da preschent èn gia passads set mais da l'onn internaziunal dals manaschis purils famigliars. Deditgà il 2014 a quels ha naging auter che l'Organisaziun da las Nazius Unidas (ONU). Nizzegia l'occcasiun da far attent a l'impurtanza da quest onn ha er l'Uniu purila grischuna e quai cun envidar il di da la festa nazionala, a Vicosoprano, ad in ensolver. Indigens e giasts èn vegnids cun plaschair al bain puril dals frars *Luigi e Tarcisio Pedroni*, per giudair ils products fatgs en chasa. Ina buna part dals numerus preschents èn er vegnids per far onur a la cussegliera federala *Eveline Widmer-Schlumpf*, il giast il pli prominent da l'ensolver dals 1. d'avust. *Anna Giacometti*, la presidenta communal da la vischnanca Bregaglia è sa mussada fitg ventiraivla da la visita da la cussegliera federala grischuna. Cussegliera federala *Eveline Widmer-Schlumpf* enconuscha bain quella regiun e ses quitads, cun gia esser stada avant dus onns en Bregaglia,

en ses onn presidial, ha ditg *Anna Giacometti*. Viver en quella val saja davairas in privilegi, ha manegia la presidenta communal. La vischnanca Bregaglia ha dal reminent 1600 abitants ed en tut 27 manaschis purils. Enramà è il brunch puril vegni cun musica singulara dal «Gruppo flautic Bregaglia» e cun chant da bellezza dal «Coro virile Bregaglia».

Dapli valuta sociala per las puras

Cussegliera federala *Eveline Widmer-Schlumpf*, ha ditg che 40 pertschient da la populaziun da quest mund vivia da la produziun agricola. Sco en auters pajais dovria er la Svizra l'agricultura e las famiglias che segnian per la produziun sin ils bains purils. Ils manaschis purils sajan da gronda impurtanza per il provediment local e regional ed ils purs cun lur famiglias segnan per il mantegniment e per la tgira da la cuntrada. Ultra da quai sappian purs e puras er ir enturn premurus cun il terren e dar vinavant la produziun adequata a la natira dals animals. Las famiglias purilas sajan cunzunt er en il Grischun ina ferma pitga cunter la depopulaziun, ha ditg *Eveline Widmer-Schlumpf* a la gronda raspada. Cuntari als manaschis industrials saja la pluralitad dals bains purils er en possess da famiglias, quai che garanteschia er pli

tgunsch ina cuntinuitad. La cussegliera federala è er da l'avis che en l'avegnir duajan las puras avair la medema reconuschientscha e cunzunt la valita sociala sco mintga singul pur. Las puras prestan lavur exemplarica e meritan dapli stima betg mo en la famiglia, mabain er en la publicitad.

Rinforzar manaschis ed organizaziuns

A pled è er vegni *Hansjörg Hassler*, il cusseglier nazional e president da l'Uniu purila grischuna. El ha ditg che avant 30 onns aveva la Svizra anc 100 000 bains purils ed oz sajan quai anc 55 000. Trais pertschient da la populaziun svizra lavura en l'agricultura ed en l'India sajan quai cun 75 pertschient considerablaim dapli. Che l'ONU haja declerà il 2014 sco onn internaziunal dals manschis purils famigliars saja bain in fatg zunt plaschivel, ha ditg *Hansjörg Hassler*. «Per nus vul quai dir rinforzar noss manaschis purils e cunzunt er las organizaziuns purilas», ha menziunà il pur da Donat. La gronda chargia da lavur na dastgia tuttina betg daventar ina hipoteca e quai per nagin pur e nagina pura. Cument saja el tuttina ch'ils manaschis purils mantegnan la structura dal lieu e la vita en vischnanca.



Commembras e commembers da la suprastanza da la vischnanca Bregaglia cun la cussegliera federala.



Chantan cun plaschair l'imni nazional: Anna Giacometti, presidenta communal e Hansjörg Hassler, cusseglier nazional.



Hans Peter Michel, il president dal cussegl grand cun Ilva e Peider Ratti, l'anterior inspectur chantunal da chatscha (da san.).



Ina da las dunnas tipicas da la Bregaglia ch'è stada a la festa..



Cun il «Gruppo flautic Bregaglia» ha er sunà Anna Ratti.



Chant dal «Coro virile Bregaglia», per ils numerus visitaders.



A l'entschatta da l'occurrèza era l'aura anc empernaivla, lura ha cumenzà la plievgia.